

道德真經三解卷之二

玉 寅 子 鄧 錡 述

改二

致虛極章第十六

致虛極守靜焉萬物並作吾以觀其復夫物芸芸各歸其根歸根曰靜靜曰復命復命曰常知常曰明不知常妄作凶知常容容乃公乃王王乃天乃道乃久沒身不殆
經曰致虛極守靜焉也萬物並作吾以觀其復夫物芸芸各歸其根也歸根曰靜靜曰復命復命曰常知常曰明也不知其常妄作乃凶知常能容乃公公乃王王乃天乃道乃久是以沒身不殆
道曰太極中空致虛極也虛極既致靜焉乃守分陰分陽兩儀立焉至於四象八卦而生三百八十四爻萬物並作乾以君之也吾以觀其復坤以藏之也故曰夫物芸芸各歸其根歸根曰靜萬物之所歸也靜曰復命冬至一陽生也復命曰常又行一周天也知常曰明四時不忒也不知常使民失時也故妄作凶矣知常則能容萬物

是知容乃公道公乃王道王乃天道天乃道道德之道恒久而不已也是以沒身不殆
德曰紫陽言萬物芸芸各反根歸根復命即長存知常妙道人難會妄作招凶往往

聞致虛至極守靜至篤故得萬物並作吾欲以觀其復夫物芸芸各歸其根而人蠢蠢不知復命悲夫復命曰常知常曰明苟知其常不妄作勞不知其常以妄為常以妄為常則以欲竭其精以耗散其真是以凶也知常則能容物矣容乃生公公乃生王王乃生天天乃生道得道乃久是以沒身不殆

太上章第十七

太上不知有之其次親之譽之其次畏之侮之信不足有不信猶其貴言功成事遂百姓皆謂我自然
經曰太上之道不知有之其次親之始知譽之其次不親尚知畏之次不畏從而侮之故信不足而有不信夷猶猶其貴言說

逮乎功成事遂百姓皆謂我之自然

道曰太上之道太極一團也不知有之是生兩儀也其次親之譽之兩儀生四象也其次畏之四象生八卦也信不足有不信八卦定吉凶也猶其貴言吉凶生大業也功成事遂仁者見之謂之仁知者見之謂之知百姓日用而不知故君子之道鮮矣故曰百姓皆謂我自然

德曰太上之道西南一陽也自下而觀始知有之其次不知不觀之道但能親之譽之其次聞而畏之其次笑而侮之不笑不足以為道世人無緣哉信不足至有不信者聖人猶其貴言使人知之也及其功成事遂百姓皆謂我得自然之道不知聖人其貴言也

大道廢章第十八

大道廢有仁義智慈出有大偽六親不和有孝慈國家昏亂有忠臣
經曰大道不容仁義仁義出自大道智慧不容大偽大偽出自智慧六親和則不有

孝慈知有孝慈六親已不和矣國家治則不有忠臣知有忠臣國家已昏亂矣自然之理也

道曰大道廢有仁義義廢之於堯舜也智慧出有大偽禹湯之於桀紂也六親不和

有孝慈文武之於幽厲也國家昏亂有忠臣桓文之於定哀也大道廢聖人相三皇

而繁周易有仁義聖人宗五常而定書智慧出聖人子三王而刪詩有大偽聖人孫五伯而作春秋孝慈忠臣在其中矣

德曰大道大藥也仁義品藥也智慧妙法也大偽傍門也大藥苟廢不失品藥故曰

大道廢有仁義妙法若出必有傍門故曰智慧出有大偽藥違氣類方成象道即希

夷合自然六親不和有孝慈也一粒金丹吞入腹始知我命不由天國家昏亂有忠

臣也

絕聖棄智章第十九

絕聖棄智民利百倍絕仁棄義民復孝慈絕巧棄利盜賊無有此三者以為文不足故令

有所屬見素抱朴少私寡欲

經曰絕聖棄智民利百倍絕仁棄義民復孝慈絕巧棄利盜賊無有此三者以為文獻不足故令各有所屬見素抱朴得少私寡欲

道曰絕聖棄智民利百倍我無事而民自富也絕仁棄義民復孝慈我無欲而民自樸也絕巧棄利盜賊無有法令滋彰盜賊

多有也此三者以為文物典章不足故也故令各有所屬聖智民利之屬仁義孝慈

之屬巧利盜賊之屬惟見大素惟拘大樸即得少私寡欲不必文教而足此三者矣

德曰大道廢有仁義巧利出有盜賊此為文法不足皆令各有所屬道在先天殊無

文字語言亦無作為巧利故聖知仁義自然有乎其中矣紫陽所謂休施巧偽為功

力認取他家不死方蓋以此也惟遇太白山見素女子抱乎先天一樸自然少私寡

欲

絕學無憂章第二十

絕學無憂唯之與阿相去幾何善之與惡相

去何若人之所畏不可不畏荒兮其未央哉衆人熙熙如享太牢如登春堂我獨泊兮其

未兆若嬰兒之未孩乘棄兮若無所歸衆人皆有餘而我獨若遺我愚人之心也哉泚泚

兮俗人昭昭我獨若昏俗人察察我獨悶悶忽若騫寂兮似無所止衆人皆有以我獨頑

且鄙我獨異於人而貴食於母

經曰絕學則無憂若至一唯與阿其間相去幾何乃至善之與惡其間相去何若人

之所畏不可不畏果無所畏流連荒亡其未極哉衆人熙熙如享太牢如登春臺我

獨澹泊如未形兆癡若嬰兒未成提孩乘乘且止若無所歸衆人世味皆謂有餘而

獨我為入長若有遺我豈愚人之心也哉混混沌沌一無所知俗人昭昭我獨若昏

俗人察察我獨悶悶忽然若騫寂兮似無所止世人皆有所以我獨頑且鄙我獨異

於人者何哉而貴食於萬物之母

道曰絕此三者之學始得無憂矣一唯聖

智仁義阿附巧利盜賊其間相去幾何聖智之善盜賊之惡相去何若君子有三畏畏天命畏大人畏聖人之言小人不知天命而不畏也荒兮淫兮無所不至登春臺享太牢世人之極樂也惟我澹泊如未形兆若為嬰兒未得提孩之養乘乘兮若無所歸衆人有餘招損之道也我獨若遺受益之道也以此言之我愚人之心也哉混兮沈兮養素抱樸俗人昭昭察察亡而為有虛而為盈也我獨昏昏悶悶有若無實若虛也故忽然鶴晦若入冥息寂兮家兮又似無所止而不有為也衆人有為皆有所以我獨如頑且鄙皆出無心我有獨異於人者一而已矣求食母道而衆人不知其貴也

德曰絕此聖智之學不為後天盜賊之利吾有何憂吾有何患故曰唯之與阿相去幾何善之與惡相去何若大事在身動止畏忌苟不知畏左金右木無所不至若在衆人熙熙然如享太牢之滋味荒荒兮如

春登臺之極樂我獨畏之何哉二氣未有形兆嬰兒未成提孩乘乘兮若無所歸如龜養虛如雞抱卵如龍蛇骨如蛇存身朝屯暮蒙午始子復衆人皆曰有餘而豈真知我哉我獨若遺多矣我非愚人之心而

不知足混兮沈兮惟要養成大道昏昏悶悶猶畏散失昭昭察察可在畏邪故忽若月晦生光息明旁死載管寂兮家兮而又似無所止恍恍惚惚其中須有一物而乘也衆人得之皆有所用我獨愚頑且鄙堅固精粹壽千萬劫然後遣其幻妄一歸真靈變變化化與道合真此我獨異於人者以其太始之時而貴求食於母也故曰天下女兒是我母

孔德之容章第二十一

孔德之容唯道是從道之為物唯恍唯惚惚兮恍兮其中有象恍兮惚兮其中有物窈兮冥兮其中有精其精甚真其中有信自古及今其名不去以閱衆甫吾何以知衆甫之然哉以此

經曰威德形容唯道是從道之為物恍恍惚惚惚兮恍恍其中有象恍兮惚惚其中有物窈兮冥兮其中有精其精甚真其中有信其精甚真其信甚時象物精信恍惚窈冥自古及今其名不去所以閱其衆甫

吾何以知衆美之然哉以此精信之道道曰著之德圓而神卦之德方以知昏一陰一陽之謂道也故曰唯道是從夫道之為物也不見惚恍不知有象不見恍惚不知有物故精信而行之不報者自見其道於窈冥之間矣是以自古及今其名不去常無欲以觀其妙玄之又玄入於衆妙之門者以此

德曰人之學道無德可容唯道是從孔德之容先天為物相逢恍惚先天為象相見惚恍先天之精得之窈冥其精甚真先天之信得之真窈其信甚時是以自古及今鉛汞之名不去以觀衆人之甫吾何以知其甫之為美以此先天鉛汞

曲則全章第二十二

曲則全枉則直窪則盈弊則新少則得多則
惑是以聖人抱一為天下式不自見故明不
自是故彰不自伐故有功不自矜故長夫惟
不爭故天下莫能與之爭古之所謂曲則全
者豈虛言哉誠全而歸之

經曰曲則全枉則直窪則盈弊則新少則
得多則惑損益盛衰之道也是以聖人唯
抱手一以為天下之式不自見故能明不
自是故能彰不自伐故有功不自矜故能
長唯此不爭故天下莫能與之爭古之所
謂曲則全者豈虛言哉誠能全而歸之
道曰尺蠖之屈以求信也龍蛇之蟄以存
身也精義入神以致用也利用安身以崇
德也其先曲而枉之而後全而直之其先
窪而弊之而後盈而新之其先少之而後
得之其先多之而後惑之消息盈虛之道
也是以聖人抱手一貫之一而為天下所
矜式一不自見故能用天下之明一不自
是故能用天下之彰一不自伐故能用天
下之功一不自矜故能用天下之長夫唯

不爭故天下莫有與之爭豈虛言哉誠能
全而歸之

德曰大直若屈大巧若拙大辯若訥故柔
之勝剛弱之勝強必然之理也紫陽有云
但將死尸為生尸莫把生門作死門若會

殺機明反覆始知害裏却生恩曲則全也
是以聖人抱手太極之一以為潛龍勿用
確乎其不可拔而為天下所矜式故自見
者不明自是者不彰自伐者無功自矜者
不長唯一不爭二字可以縱橫天下而皆

莫能與之爭也故言之所謂曲則全者豈
虛言哉誠全而歸之

希言自然章第二十三

希言自然飄風不終朝驟雨不終日孰為此
者天地天地尚不能久而況於人乎故從事
於道者道者同於道德者同於德失者同於
失同於道者道亦得之同於德者德亦得之
同於失者失亦得之信不足有不信
經曰夷希為言自然之道也飄風不終朝
驟雨不終日孰為此事天地也天地之為

尚不能久而況於人乎故從事於道者道
者同於道德者同於德至失者亦同於失
故同於道者道亦得之同於德者德亦得
之同於失者失亦得之猶信不足則有不
信

道曰飄風驟雨天地之所為也尚不能終
日而況於人乎天地之為風雨飄驟自有
定數然風雨不能久者亦天地自然之道
也故曰希言自然是故以此從事於道者
即同於道而道亦得之以此從事於德者
即同於德而德亦得之乃至從事於失者
即同於失而失亦得之惟是信不足至有
不信試推而行之未有不信者矣苟非其
人道不虛行

德曰天地以雷風為藥聖人以鉛汞為藥
希言自然之道也飄風驟雨陰陽妄行者
也故无妄九五曰无妄之疾勿藥有喜重
人象曰无妄之藥不可試也黑鉛凡汞亦
水火妄行者也故上九曰无妄行有言無
攸利聖人象曰无妄之行窮之災也夫无

妄之往天地聖人尚不能久而況於世人乎故同於道者道亦同之同於德者德亦同之同於失者失亦同之因信不足至有不信者此所謂當面蹉過虛生虛死而與草木同朽腐也悲夫

跛者不立章第二十四

跛者不立跨者不行自見者不明自是者不彰自伐者無功自矜者不長其在道也曰餘食贅行物或惡之故有道者不處

經曰足跛者不立股跨者不行自見者不

明自是者不彰自伐者無功自矜者不長其在道也曰殘餘之食死贅之行物或惡之故有道者不處也

道曰眇能視不足以有明也跛能履不足以與行也而況於跨跨手舜闢四門明四

目達四聰故冕旒閉目不明而明也黈纊塞耳不彰而彰也舜亦以命禹曰汝惟不矜天下莫與汝爭能汝惟不伐天下莫與汝爭功其在道也曰有為無為之餘食刑政道德之贅行造物或惡之矣故有道者

不處

德曰跛者不立孤清寡靜也跨者不行孤陰寡陽也其何以行之哉紫陽所謂須知大隱居鄆市莫只深山守靜孤故曰自見者不明自是者不彰自伐者無功自矜者不長其在道也曰殘餘食燕津納氣也死贅之行枯坐生疾也物或惡之故有道者不處也

有物混成章第二十五

有物混成先天地生寂兮寥兮獨立而不改周行而不殆可以為天下母吾不知其名字之曰道強為之名曰大大曰逝逝曰遠遠曰反故道大天大地大亦大域中有四大而王居其一焉人法地地法天天法道道法自然

經曰有物混成先天地生寂兮寥兮獨立而不改周行而不殆可以為天下母先天之至寶也吾不知其名字之曰道強為之名曰大大則必逝逝則必遠遠則必反原始反終之道也故道大天大地大亦大

域中有四大而王居其一焉道之主也人法地地法天天法道道法自然道之神也道曰太極之虛中有神物混然而成先天地生而立兩儀寂兮寥兮於無有之鄉首出庶物之上獨立而不改其色周行而不

殆實可以為天下萬物之母故聖人字之

曰道強名曰大大哉乾元萬物資始乃統天雲行雨施品物流形大明終始六位時成故曰大大曰逝逝曰遠遠曰反剝反為復之道也故道大神無方而易無體也天

大天何言哉四時行焉地大地順承天百物生焉王亦大天造草昧宜建侯而不宰域中有四大而王居其一焉人之主也人法地地法天天法道道法自然人之用也大哉聖人之言

德曰太極圈中有一神物可重一斤十六兩零三百八十四銖五千四十年又五千四百日而後結成形如雞卵色似丹砂明如嫩日味勝甘露先天地而生後天地而成天地得之而生萬物聖人得之而生萬

民雖寂寥獨立而不改其變雖周圍啓行而不危其化可以為天下民物之母神乎神乎故聖人字之曰道強名曰大大則乃逝逝則乃遠遠則乃反不遠復也天以始生言之自上而下王亦主之地以既成言之自下而上王亦主之天地生成者道也王中主者之心也聖人窮理盡性以至於命矣

重為輕根章第二十六

重為輕根靜為躁君是以君子終日行不離輻重雖有榮觀燕處超然如何萬乘之主而以身輕天下輕則失臣躁則失君

經曰重者輕之根也靜者躁之君也是以君子終日行而不附離於輻重所以萬乘之主而以身輕天下則不失其臣也雖有榮觀燕處超然躁則不失其君也以輕為事必失其臣以躁為事必失其君道曰合抱之木生於毫末重為輕之根也清靜為天下正靜為躁之君也是以君子終日行不附輻重恐為輕躁所累雖有榮

觀以重觀輕也燕處超然以靜勝躁也如何萬乘之主而以身輕天下蓋一身重者輕之根蒂也萬乘之靜者躁之君主也夫輕者枝葉也重者根本也以外物言之本乎天者親上枝葉在上故輕為重之君本乎地者親下根本在下故重為輕之臣若執輕而行之則必失重臣故曰輕則失臣以萬乘言之靜者無為也躁者有為也我無為而民自化無為在上故靜為躁之君我有為而民自亂有為在下故躁為靜之臣若執躁而行之則必失靜君故曰躁則失君文乎老子之言矣

德曰純陽有云道本虛無一炁生天生地生人都來些子氣精神造化不離玄牝玄牝之門是謂天地根故重為輕根正陽有云妙法三千六百門學人各執一為根誰知些子神仙法不在三千六百門故曰靜為躁君是以君子終日行不離輻重亦猶萬乘之君而以身輕天下也雖有榮觀一念不動也燕處超然心境兩忘也輕則失

臣基址不固有傷至樂也躁則失君火候太過有傷元陽也

善行無轍迹章第二十七

善行無轍迹善言無瑕謫善計不用籌策善閉無關鍵而不可開善結無繩約而不可解是以聖人常善救人故無棄人常善救物故無棄物是謂襲明故善人不善人之師不善人善人之資不貴其師不愛其資雖智大迷是謂要妙

經曰不見轍迹可謂善行不見瑕謫可謂善言不用籌策可謂善計善閉無關鍵而不可開善結無繩約而不可解是以聖人以常善救人故無棄人以常善救物故無棄物此謂相襲而明也故善人者不善人之師不善人者善人之資不以善人貴其師不以不善愛其資雖曰智慧謂之大迷既智返迷是謂要妙

道曰春夏秋冬天之四府善行無轍迹也易書詩春秋聖人四府善言無瑕謫也生長收藏善計不用籌策也坤以藏之善閉

無關鍵而不可開也乾以君之善結無繩約而不可解也是以聖人以天地常道教人故無棄人以天地常道教物故無棄物是謂相襲而明也何謂襲明故善人乃不善人之師不善人乃善人之資非襲明而

何不以其不善貴其師不以善人愛其資雖有大知亦曰大迷反乎樸素是謂要妙

德曰日用踐履無轍可逆口傳心受無瑕可請依時採取不用籌策可謂善計殊無關鍵而不可開可謂善閉殊無繩約而不

可解可謂善結此無為清靜之道也是以聖人常善教人人有道故無棄人常善教物物有道故無棄物是謂人物相襲而明天地之大道也故善人襲不善人以為資不善人襲善人以為師遂使善與不善俱

有大得亦不貴其師亦不愛其資故人無棄人物無棄物智而復迷迷而復智是謂妙道之要也

知其雄章第二十八

知其雄守其雌為天下谿為天下谿常德不

離復歸於嬰兒知其白守其黑為天下式為天下式常德不忒復歸於无極知其榮守其辱為天下谷為天下谷常德乃足復歸於樸樸散則為器聖人用之則為官長故大制不割

經曰知其雄守雌為天下谿守雌為谿常德不離合德不離復歸於嬰兒知其白守黑為

天下式守黑為式常德不忒合德不忒復歸於无極知榮守辱為天下谷守辱為谷常德乃足合德乃足復歸於樸散則為器

聖人用之則為主官故大制不割害其樸也

道曰知其雄守其雌乾知太始坤作成物也故為天下谿地道無成而代有終也故曰常德不離冬至一陽復生坎震故曰復

歸於嬰兒知其白守其黑戰乎乾勞乎坎金水相生也故為天下式十二辟卦生成萬物也故曰常德不忒十月坤藏復歸於无極也知其榮守其辱否泰相交損益盛衰之始也故為天下谷離終于寅坎終于

申故曰常德乃足成終成始復歸於樸形而上者謂之道形而下者謂之器故曰樸散則為器聖人居中履正以為萬物之主故大制不割復歸於樸而又原始反終矣德曰知其雄守雌以木剋金以汞制鉛金木

間隔汞鉛相制二氣網緼聚於一道故為天下谿是以常德不離養成嬰兒知其白守黑白為他人黑屬自己主其他人之白守其自己之黑故為天下式是以常德不忒復歸於无極十月坤道也知榮守辱榮金

辱木常德不足知其金之榮守其木之辱故為天下谷是以常德乃足復歸於樸樸散則為器主器者莫若長子是以聖人用之則為官長故大制不割散之斯為萬合之斯為一也神乎神乎

將欲取天下章第二十九

將欲取天下而為之吾見其不得已天下神器不可為也為者敗之執者失之故物或行或隨或煦或吹或強或贏或載或隨是以聖人去甚去奢去泰

經曰將欲取天下而為之者吾見其不得已也天下神器不可為也為者必敗之執者必失之凡在天下之物或行或隨各有一時或煦或吹各有一氣或強或贏各有一勢或載或隳各有一道是以聖人去其去奢去泰

道曰取天下者常以無事及其有事不足以取天下古之得天下無為而治者真有為也將欲取天下而為之吾見其不得已故天下神器不可妄為也為者敗之執者失之凡物行之隨之各有天時煦之吹之各有氣數強之贏之各有勢力載之隳之各有道理是以聖人去其甚不使不得已去其奢不使有敗去其泰不使有失德曰天之有天下猶人之有身也人身之事亦有自然可取之時將欲取而為之者吾見其不得已況天下人身乃上天之神器斷不可以為也取而為者必敗執而取者必失之凡人之為物行者隨之以時煦者吹之以氣強者贏之以勢載者隳之以

理是以聖人去其甚去奢去泰非以其無私邪故能成其私

以道佐人主章第三十

以道佐人主者不以兵強天下其事好還師之所處荆棘生焉大軍之後必有凶年故善者果而已不敢以取強果而勿矜果而勿伐果而勿驕果而不得已果而勿強物壯則老是謂不道早已

經曰以道佐人主者不以兵強取天下其事好還師之所處荆棘生焉大軍之後必有凶年故善佐人主者果於道而已矣不敢以取強果而勿伐果而勿驕果而不得已者勝乃是果而勿強也蓋物壯則老是謂非道如知非道不如早已
道曰公卿以道佐人主不以兵強天下人主以道佐天地不以暴政害物泰象曰天地交泰后以財成天地之道輔相天地之宜以左右民故得道者多助失道者寡助多助之至天下順之寡助之至親戚畔之以天下之所順攻親戚之所畔故君子有

不戰戰必勝矣不以兵強也苟以兵強天下其事必然好還師之所處荆棘生焉大軍之後必有凶年天道好還也臨之二陽至于八月有凶是矣故善戰者果於道而已矣不敢以兵取強焉取強必敗苟得其果而勿矜勿伐勿驕而不得已果而勿強何哉蓋物壯則老是謂非道如知非道不如早已

德曰人主心也以道治心者恬淡為上不取以戰勝之兵而取天下太陽流味長欲去人故天發殺機龍蛇起陸人發殺機天地反覆其事必然好還天搖地動山崩谷裂樹倒林摧河枯海竭豈非師之所處荆棘生焉大軍之後必有凶年乎真可畏也故善戰者果於道而已矣果得其道不已何為復敢以取強為所以不矜不伐不驕長若不得已乃是果而不敢強何則用壯處謙壯乃全矣用壯羸觸藩矣謂物壯而已則老此謂非道知其非道早已勿為

夫佳兵章第三十一

夫佳兵者不祥之器物或惡之故有道者不處是以君子居則貴左用兵則貴右兵者不祥之器非君子之器不得已而用之恬淡為上勝而不美而美之者是樂殺人夫樂殺人者不可得志於天下是故吉事尚左凶事尚右偏將軍處左上將軍處右言以喪禮處之殺人衆多以悲哀泣之故戰勝則亦以喪禮處之

經曰夫以兵為佳者不祥之器也物或惡之故有道者不處是以君子居則貴左主生也用則貴右主殺也兵者不祥之器非君子之器不得已而用之者須以恬淡為上故勝而不知為美也若以為美必樂之樂之者是樂殺人也夫樂殺人者人必殺之不可得志於天下矣故吉事尚左凶事尚右偏將軍處左不主殺也上將軍處右言居上勢則以喪禮處之殺人衆多以悲哀泣之故戰勝則亦以喪禮處之道曰師衆也貞正也能以衆正可以王矣至於剛中而應行險而順以此毒天下而

民從之吉民苟不從何凶無之故兵之佳者尚為不祥之器而況於取強乎物或惡之矣故有道者不處也是以君子居則貴左帝出于震春生以仁也故吉事尚左是以偏將軍處左六四師左次則以吉禮處之用兵則貴右王董子允秋殺以義也故凶事尚右是以上將軍處右言居上勢則以喪禮處之兵者不祥之器非君子之器也不得已而用之者必以恬淡虛無為上故不為美也若以兵為美事必如秦楚而樂殺人也夫樂殺人者不可得志於天下悉歸于炎漢矣故殺人衆多以悲哀泣之故數戰數勝亦以喪禮處之德曰純陽有云吾有三劍而斬世人之欲紫陽云先且觀天明五賊次須察地以安民民安國富當求戰戰罷方能見聖人此最兵之佳者亦為不祥之器有物或惡之者故有道者不處是以君子居則貴左知雄守雌以養木液也用兵則居右知白守黑以取金液也取則有道不以兵強取之

兵者不祥之器非君子之器如不得已而用之恬淡為上故不以兵為美而樂之是殺人之利器也夫樂殺人者其事必好還不可得志於天下矣是以偏將軍處左故以吉禮處之上將軍處右故以喪禮處之好聞者必遇其敵可不慎哉

道常無名章第三十二

道常無名樸雖小天下不敢臣侯王若能守萬物將自賓天地相合以降甘露人莫之令而自均始制有名名亦既有夫亦將知止知止所以不殆譬道之在天下猶川谷之與江海

經曰道常無名其樸雖小天下不敢臣侯王若能守之萬物將自賓矣故天地相合以降甘露人莫之令而物自均始制有名物既有名亦將知止知止所以不殆譬如道之在天下亦由川谷之與江海也道曰道常無名天地之始也始制有名萬物之母也其樸雖小乃道常之一天下誰敢臣之故王侯得一以為天下正若能守

之萬物將自賓矣天地相合以降甘露故
允者說也以形普沾於萬物之上而為發
生之利澤豈人力之為哉而物自均矣始
制有名也名既遠矣亦將知止知止所以
不殆夫道之於天下天下雖大皆歸于道
江海之於川谷川谷雖眾皆赴於江海侯
王之於萬物萬物雖殊皆賓於侯王有名
而不知止者惡乎何歸

德曰其道與常本無名字先天一氣也形
質雖小天下誰敢臣之侯王人身之主也
若能守此先天一氣不以為小則身中萬
事萬物自賓服矣故天地網緼萬物化醇
男女媾精萬物化生聚精會神以降甘露
人莫之令而自均復歸於嬰兒始制有名
也名亦既有夫亦將知止不敢有為為則
殆矣故曰知止所以不殆夫萬物皆歸于
人身譬猶天下皆歸于道川谷皆歸于江
海矣豈不大哉

知人者智章第三十三

知人者智自知者明勝人者有力自勝者強

知足者富強行者有志不失其所者久死而
不亡者壽

經曰知人者智自知者明勝人者有力自
勝者乃強知足者長富強行者有志居不
失其所者能久身死而名不亡者為壽

道曰道人胷中自有水鏡萬象起滅無逃
其形水主智知人者智也聖人之道克已
復禮知常容乃公公生明自知者明也言

凶者貞勝者也至於以強凌弱以眾暴寡
勝人者有力也一日克己復禮天下歸仁

焉自勝者強也富莫大於知足禍莫大於
不知足貴莫大於知止殆莫大於不知止
知足者富也君子以自強不息有志也并
居其所而不遷而不失其所者恒久之道
也豫六五貞疾恒不死中未亡也雖亡而

壽者恒不死之道也

德曰知已知彼百戰百勝不知彼而知己
一勝一負不知己不知彼百戰百敗凡養
生之道必以陰陽互為其基輕重不敢偏
失先要知人後要知己不知不明陰陽偏

失如何成事勝人者不在有力自有道理
自勝者却在有力自無道理既有其名亦
將知止故知足者長富如此力行而不倦
者有志之士也進退消長抽添運用而不
失其所者可謂恒久而不已也雖沒而不
殆雖死而不亡三坐在立亡形神俱妙可謂
恒壽而不已也

大道汎兮章第三十四

大道汎兮其可左右萬物恃之以生而不辭
功成不名有愛養萬物而不為主常無欲可
名於小萬物歸之而不為主可名於大是以
聖人終不為大故能成其大

經曰大道汎兮無可左右萬物恃之以生
而不有辭功成不名有覆載萬物而亦不
為主故常無欲此可名於小矣萬物歸之
而不知主此可名於大矣是以聖人終不
為大故能成其大

道曰以萬物觀天地則天地之謂天地以
道觀天地則天地亦萬物耳故大道汎兮
皆是無可左右者故物恃之以生而亦不

有辭萬物家之以成而亦不為主功成亦
不有名故常無欲卷之不盈握此皆名於
小矣萬物歸之而不知主散之彌六合此
可名於大矣是以聖人能成其大也終不
以為大故能成其大天地設位聖人成能
人謀鬼謀百姓與能

二十五

德曰太極大道汎兮周行一百萬八千里
包乎天地六十四萬里升降於三萬里之
中迎之不見其音隨之不見其後其可以
左右乎天地萬物恃之以生其道何辭天
地萬物賴之以成其道何主以氣言之其
稱名也小以物言之其取類也大是以聖
人提挈天地之道把握陰陽之氣以一元
為一年以一年為一日以一日為一時奪
造執於須臾成大功於頃刻然後洗心防
思退藏於密故曰是以聖人能成其大也

執大象章第三十五

執大象天下往往而不害安平泰樂與餌過
客止道之出言淡乎其無味視之不足見聽
之不足聞用之不可既

經曰無象之象是謂大象執往天下有何
害矣豈止不害安且平泰樂與人餌過客
亦止道之為言淡乎其無味視之不足見
聽之不足聞及用之亦不可盡既
道曰惚兮恍其中有象聖人執而行之雖

往天下不為害矣以其安平且泰皇建其
有極也無偏無陂遵王之義無有作好違
王之道無有作惡遵王之路無偏無黨王
道蕩蕩無黨無偏王道平平無反無側王
道正直會其有極歸其有極故樂與百姓
餌之逆使有過之客無不知其止矣夫道
之出其言淡乎其無味又非中邊皆甜吾
千退席也視之不足見不可用明焉聽之
不足聞不可用聰焉是以聖人取諸十三
卦象備物致用立成器以為天下利百姓
日用而不知故曰用之不可既

二十六

德曰大象先天之道也聖人執之而往天
下不有害矣是以得道之士刀鋸不能加
水火不能傷何害之有哉以其神形既安
心情既平性命既泰也故以此象樂與天

下餌之雖有大過之客亦反身而知止矣
何則知其大象可執也夫大象之道出言
無味餌亦無味視之不可見聽之不可聞
及其用之大有神效不可既盡

將欲翕之章第三十六

將欲翕之必固張之將欲弱之必固強之將
欲廢之必固興之將欲奪之必固與之是謂
微明柔勝剛弱勝強魚不可脫於淵國之利
器不可以示人

經曰張之必翕強之必弱興之必廢奪之
必與將欲如此得之必固如此失之是謂
微而明也柔勝剛弱勝強若魚剛強不可
脫於柔弱之淵故國家利器亦不可以示
人

二十七

道曰內文明而外柔順以蒙大難文王以
之利艱貞晦其明也內難而能正其志箕
子以之故月不晦則不明爽不昧則不旦
天不寒則不暑地不藏則不生天地造物
之權也至如東作西成民利百倍百姓之
權也可與立未可與權聖人深器之柔之

勝剛弱之勝強若魚龍不可脫於淵是謂先微而後著也是知柔弱淵源江海之利器也固不可以見怪見怪則殆張強與與國家之利器也固不可以示人示人則危幾事不密則害成也必矣

德曰知雄守雌為天下谿知白守黑為天下式道者盜也三盜既宜德者得也一得為度大抵修鍊者人為也雖曰人為靜為躁若陰陽須配合火候要調停喻弱廢奪而在在我者故靜以待動張強與與而在人者故動以隨靜此謂幽微而著明也萬物生于水而歸于水水至柔弱魚龍不可以脫於淵也人至剛強不可以脫于天一之水故國之利器不可以示人輕易示人必致凶害人之至寶不可以示人輕易示人必遭譴誦此天地聖人之權非縱橫揮闔之語也明矣

道常無為章第三十七
道常無為而無不為侯王若能守萬物將自化化而欲作吾將鎮之以無名之樸無名之

樸亦將不欲不欲以靜天下將自正
經曰道常無為而無不為也侯王若能守萬物將自化化而欲作不知無為吾將鎮之以無名之樸無名之樸亦將不欲不欲惟以靜靜則天下將自正

道曰道本無為常本無欲無為無欲而無不為無不欲也侯王若能守之萬物將自化矣黃帝堯舜垂衣裳而天下治無為而治也夫何為哉恭己正南面而已矣故曰我無為民自化化之欲作又恐專於有為吾將鎮之以無名之樸道常無為也夫無名之樸亦將不欲以治天下欲者守之以靜靜則天下將自正矣
德曰道常無為清靜法身也而無不為矣侯王若能守之以道萬物將自化生化而欲作吾將鎮之以無名之樸先天大藥也先天大樸亦豈所欲欲而不欲惟守以靜天下性命將自正矣道常無為而為真有為也有為而為必不至如此之妙

道德真經三解卷之二

道德真經三解卷之三 改三

玉 賓 子 鄧 錡 述

上德不德章第三十八

上德不德是以有德下德不失德是以無德上德無為而無以為下德為之而有以為上仁為之而無以為上義為之而有以為上禮為之而莫之應則攘臂而仍之故失道而後德失德而後仁失仁而後義失義而後禮失禮者忠信之薄而亂之首也前識者道之華而愚之始是以大丈夫處其厚不處其薄居其實不居其華故去彼取此

經曰上德不患失是以有德下德患失是以無德上德無為而無有以為下德為之而有以為也上仁為之而無以為德與之應上義為之而有以為仁與之應上禮為之而義莫之應矣豈止不應則又攘臂而仍之故失道而後德失德而後仁失仁而後義失義而後禮失禮者以其忠信之薄而為亂之首也前識先覺者道之華而反為愚之始是以大丈夫處其厚不處其薄